



**Resultate Persverklaring vir Remgro Beperk  
(Remgro)**

**DIE MEESTE VAN REMGRO SE BELEGGINGS LEWER GOEIE RESULTATE**

- Wesensverdienste per aandeel neem met 58.2% tot 1 292.4 sent toe
- Wesensverdienste per aandeel (uitgesluit Mediclinic herfinansieringskoste in die vorige jaar) neem met 20.5% tot 1 292.4 sent toe
- Totale dividend per aandeel vir die jaar neem met 12.4% tot 389 sent toe
- Intrinsieke netto batewaarde per aandeel neem met 20.1% tot R245.96 toe

**Oorsig**

Die meeste van Remgro se beleggings het prysenswaardig presteer vir die jaar geëindig 30 Junie 2014 gegewe die moeilike handelstoestande wat sekere marksektore in die gesig gestaar het. Die gesondheidsorg, versekering en bankwese beleggings het uitstekende resultate gerapporteer terwyl die laer wesensverdienste vanaf voedsel, drank en huishoudelike sorg die kompeterende handelsomgewing en die onderdrukte ekonomiese toestande reflekteer.

Wesensverdienste vir die jaar tot 30 Junie 2014 bedra R6 635 miljoen vergeleke met R4 196 miljoen vir die jaar tot 30 Junie 2013, wat 'n styging van 58.1% verteenwoordig, terwyl wesensverdienste per aandeel met 58.2% van 817.1 sent tot 1 292.4 sent toegeneem het. Wesensverdienste, met uitsluiting van die uitwerking van die eenmalige items wat met Mediclinic se herfinansieringstransaksie verband hou, het met 20.5% vanaf R5 508 miljoen tot R6 635 miljoen toegeneem, soos in die tabel hieronder aangetoon.

	<b>Jaar geëindig 30 Junie 2014</b>	<b>Verandering %</b>	<b>Jaar geëindig 30 Junie 2013 Hersaamgestel<sup>1</sup></b>
<b>Bydrae tot wesensverdienste:</b>	<b>(R'miljoen)</b>		<b>(R'miljoen)</b>
Voedsel, drank en huishoudelike sorg	795	(29.2)	1 123
Bankwese	2 542	22.4	2 077
Gesondheidsorg	1 489	403.3	(491)
Versekering	871	30.8	666
Nywerheid	700	27.7	548
Infrastruktuur	166	(15.3)	196
Media en sport	64	(46.2)	119
Ander beleggings	59	3.5	57
Sentrale tesourie	83	2 666.7	3
Ander netto korporatiewe koste	(134)	(31.4)	(102)
<b>Wesensverdienste</b>	<b>6 635</b>	<b>58.1</b>	<b>4 196</b>
Mediclinic herfinansieringskoste	-	-	1 312
<b>Wesensverdienste (uitgesluit Mediclinic herfinansieringskoste)</b>	<b>6 635</b>	<b>20.5</b>	<b>5 508</b>

Nota 1: Met ingang van 1 Julie 2013 het Remgro IFRS 10: Gekonsolideerde Finansiële State, IFRS 11: Gesamentlike Reëlins en die gewysigde IAS 19: Werknemersvoordele, geïmplementeer. Al hierdie rekeningkundige standaarde is terugwerkend toegepas en gevolglik is die finansiële resultate van die jaar geëindig 30 Junie 2013, hersaamgestel.

Remgro se intrinsieke netto batewaarde per aandeel het met 20.1% tot R245.96 op 30 Junie 2014 (30 Junie 2013: R204.83) toegeneem.

Kontant by die kern het met R531 miljoen tot R3 264 miljoen op 30 Junie 2014 toegeneem. Die nuwe beleggings gemaak en lenings toegestaan ten bedrae van R1 347 miljoen was hoofsaaklik weens die belegging in Grindrod van R551 miljoen, 'n lening aan Unilever SA van R283 miljoen, bydraes aan die Milestone Capital Funds van R258 miljoen, 'n belegging in die CIV groep van R67 miljoen, die deelname aan twee PGSI regte uitgifte van R47 miljoen en kleiner beleggings ten bedrae van R141 miljoen in verskeie ongenoteerde beleggings.

### **Kommentaar op rapporteringskategorieë**

#### ***Voedsel, drank en huishoudelike sorg***

Die bydrae van voedsel, drank en huishoudelike sorg tot Remgro se wesensverdienste het R795 miljoen bedra (2013: R1 123 miljoen), 'n afname van 29.2%. Hierdie afname is hoofsaaklik die gevolg van laer bydraes van RCL Foods en TSB. RCL Foods het 'n wesensverlies van R303 miljoen gerapporteer vir die jaar onder oorsig (2013: R29 miljoen wins), waarvan Remgro se gedeelte van die verlies R239 miljoen (2013: R21 miljoen wins) bedra het. In die jaar onder oorsig is FCL Foods se resultate negatief beïnvloed deur die volgende items:

- Wesentlike buitelandse valutaverliese weens die vroeë aflossing van Foodcorp se euro-gednomineerde skuld
- Eenmalige SEB-koste wat verband hou met die herstrukturering van sy SEB-aandeelhouding
- Wesentlike transaksiekoste ten opsigte van verskeie korporatiewe bedrywighede gedurende die jaar
- Voortgesette hoë vlakke van goedkoop mededingende hoenderinvoere en hoë insetkoste

TSB se bydrae tot wesensverdienste was R192 miljoen (2013: R316 miljoen). Daar moet op gelet word dat TSB se bydrae net sy resultate vir die ses maande tot 31 Desember 2013 insluit vanweë die feit dat Remgro in Januarie 2014 sy 100%-belang in TSB aan RCL Foods verkoop het. TSB se wesensverdienste vir die volle jaar bedra R218 miljoen (2013: R316 miljoen). Hierdie afname was hoofsaaklik te wyte aan laer plaaslike verkoopsvolumes en laer marges wat gerealiseer is weens die negatiewe uitwerking van verhoogde suikerinvoere. Unilever se bydrae tot wesensverdienste het met 18.5% afgeneem tot R347 miljoen (2013: R426 miljoen). Hierdie afname is hoofsaaklik die gevolg van groei in omset, teengewerk deur 'n toename in aanbodkettinkostes, sowel as beleggings in handelsmerke en bemarking en herstruktureringkoste. Distell se bydrae tot wesensverdienste, wat die belegging in Capevin Holdings insluit, het R495 miljoen (2013: R360 miljoen) bedra. Gedurende April 2013 het Distell vir Burn Stewart Distillers Limited verkry en sy resultate vir die huidige jaar sluit 'n gunstige hermeting in ten bedrae van R159 miljoen van die voorwaardelike teenprestasie wat met die verkryging betaalbaar is. In die vergelykende jaar is Distell se resultate negatief beïnvloed deur kostes wat verband hou met die verkryging van nuwe besighede en 'n rente-voorsiening op aksynsbelasting, wat in totaal R265 miljoen bedra het. Met die uitsluiting van hierdie eenmalige items, sou Distell se bydrae tot Remgro se wesensverdienste met 1.6% tot R442 miljoen afgeneem het. Remgro se effektiewe belang in Distell het vanaf 33.4% tot 31.0% afgeneem.

#### ***Bankwese***

Die bydrae van die bankafdeling tot wesensverdienste het R2 542 miljoen (2013: R2 077 miljoen) bedra, 'n styging van 22.4%. Beide FirstRand en RMBH het uitstekende wesensverdienste-groei van 21.8% en 22.8% onderskeidelik gerapporteer, hoofsaaklik vanweë groei in beide rente-inkomste en nie-rente-inkomste by FNB, RMB en WesBank, asook 'n aansienlike vermindering in krediet-waardedalingskoste op 'n jaargrondslag.

#### ***Gesondheidsorg***

Mediclinic se bydrae tot Remgro se wesensverdienste was 'n wins van R1 489 miljoen (2013: R491 miljoen verlies).

Hierdie toename in winste was hoofsaaklik weens die uitwerking van die eenmalige items wat met die Mediclinic-herfinansieringstransaksie in die vergelykende jaar verband hou, waarna vroeër verwys is. Uitgesluit hierdie eenmalige items, sou Mediclinic se bydrae tot Remgro se wesensverdienste met 81.4% vanaf R821 miljoen toegeneem het, hoofsaaklik vanweë stewige vertonings deur al drie bedryfsplatforms, sowel as 'n eenmalige verstreke dienskos-krediet van R192 miljoen, wat verband hou met sy aftreevoordele-verpligtinge.

### ***Versekering***

RMI Holdings is die enigste belegging wat onder versekeringsbelange gerapporteer word. RMI Holdings het 'n toename van 28.4% in wesensverdienste gerapporteer, met al drie bedryfsplatforms, naamlik Discovery, MMI Holdings en OUTsurance, wat uitstekende wesensverdiensstegroei van onderskeidelik 45.6%, 28.5% en 19.2% behaal het.

### ***Nywerheid***

Total South Africa se bydrae tot Remgro se wesensverdienste het R233 miljoen (2013: R258 miljoen) bedra en die afname is ongeag meer gunstige voorraadherwaardasies as in die vergelykende tydperk, wat teengewerk is deur 'n toename in sy voorsiening vir terreinrehabilitasiekoste. Remgro se deel van die resultate van KTH het R71 miljoen (2013: R36 miljoen) bedra. Wispeco se bydrae tot Remgro se wesensverdienste het R107 miljoen (2013: R64 miljoen) bedra. Hierdie toename in wesensverdienste is hoofsaaklik te danke aan beter verkoopsvolumes en -pryse, asook aan verbeterde produksiedoeltreffendheid. Air Products en PGSI se bydraes tot wesensverdienste het onderskeidelik R217 miljoen en R72 miljoen (2013: R180 miljoen en R10 miljoen) bedra.

### ***Infrastruktuur***

Grindrod se bydrae tot Remgro se wesensverdienste het R108 miljoen bedra (2013: R144 miljoen). Die afname is hoofsaaklik die gevolg van 'n swakker bedryfsprestasie deur sy kommoditeits-verhandelingsafdeling. Hierdie bedrywighede is, soos beplan, in die proses om afgeskaal en verkoop te word. Vir die jaar onder oorsig het die CIV groep R58 miljoen tot wesensverdienste bygedra (2013: R59 miljoen). SEACOM het 'n wesensverlies van R26 miljoen vir die jaar onder oorsig gerapporteer (2013: R3 miljoen verlies) en Remgro se deel van hierdie verlies het R6 miljoen bedra (2013: 'n verlies van minder as R1 miljoen).

### ***Media en sport***

Media- en sportbelange bestaan hoofsaaklik uit die belange in Sabido en Premier Team Holdings (PTH). Sabido se bydrae tot Remgro se wesensverdienste het R131 miljoen (2013: R148 miljoen) bedra. Hierdie afname is hoofsaaklik die gevolg van wesentlike nuwe besigheidsontwikkelings-uitgawes wat gedurende die tydperk onder oorsig aangegaan is. PTH se bydrae tot wesensverdienste was 'n verlies van R68 miljoen (2013: R37 miljoen verlies).

### ***Ander beleggings***

Die bydrae van ander beleggings tot wesensverdienste het R59 miljoen (2013: R57 miljoen) bedra, waarvan Business Partners se bydrae R33 miljoen (2013: R32 miljoen) was.

### ***Sentrale tesourie en ander netto korporatiewe koste***

Die bydrae deur die sentrale tesourie-afdeling het R83 miljoen (2013: R3 miljoen) bedra. Hierdie toename was hoofsaaklik as gevolg van buitelandse wisselkoersverliese van R98 miljoen in die vergelykende tydperk met die verskansing van die repatriasie van 'n gedeelte van Remgro se buitelandse kontant. Ander netto korporatiewe koste het R134 miljoen (2013: R102 miljoen) bedra. Hierdie toename is hoofsaaklik die gevolg van die netto na-belaste onderskrywingsfooie van R46 miljoen wat ingevolge die Mediclinic-regteaanbod in die vergelykende jaar ontvang is.

### ***Totale dividend***

Vir die jaar geëindig 30 Junie 2014, is 'n totale dividend per aandeel van 389 sent verklaar uit inkomstereserwes ten opsigte van beide die gewone aandele sonder pariwaarde en die ongenoteerde B-gewone aandele sonder pariwaarde. Hierdie verteenwoordig 'n 12.4% toename vanaf die totale dividend verklaar vir die jaar geëindig

30 Junie 2013 van 346 sent per aandeel.

### **Opsomming**

Jannie Durand, hoofuitvoerende beampte van Remgro, sê dat waar die jaar geëindig 30 Junie 2013 gekenmerk was deur hoë vlakke van korporatiewe aktiwiteit, die jaar geëindig 30 Junie 2014 gekenmerk was deur herstrukturering en uitbreiding van besighede deur beleggingsmaatskappye soos RCL Foods. Hy sê ook dat die meeste van Remgro se beleggings verwag om voortgesette ekonomiese- en handelsuitdagings in die gesig te staar vir die kort tot medium termyn, alhoewel, die groep van die opinie is dat die verklaarde strategieë en besigheidsstandaarde van hierdie besighede bevredigend is. Die hoof fokuspunt van die groep oor die medium- en langtermyn bly die realisering van aandeelhouerswaarde.

---

<b>Kontak:</b>	<b>Remgro Beperk Jannie Durand ((021) 888-3253)</b>
<b>Uitgereik en versprei deur:</b>	<b>Keyter Rech Investor Solutions Marlize Keyter (083 701 2021)</b>
<b>Uitreikingsdatum:</b>	<b>17 September 2014</b>
<b>JSE kode:</b>	<b>REM</b>
<b>Webwerf:</b>	<b><a href="http://www.remgro.com">www.remgro.com</a></b>

---